

Ufficio Stampa della Provincia autonoma di Trento
Piazza Dante 15, 38122 Trento
Tel. 0461 494614 - Fax 0461 494615
uff.stampa@provincia.tn.it

COMUNICATO n. 94 del 17/01/2026

Manà fora su Trentino Tv l program l vegn endrezà dal Comun General de Fascia

“Pedies”: en sabeda ai 17 de jené vegn fora la puntata #521 del program ladin per la televizion

[Ladino] Ence chesta setemèna l é a la leta l nef apuntament de “Pedies”, rotocalch ladin de informazion, ruà a la puntata n. 521. I argomenc che vegn portà dant te la puntata de chesta setemèna l é:

I ambulatories de traumatologia e Ortopedia de Sèn Jan i é endò averc. L’Azienda Sanitèra Universitèra del Trentin l’à troà l personal che l é debeseegn e con en jebia ai 15 de jené chest servije de gran emportanza per duta la val l é endò en funzion. I ambulatories i sarà averc duc i dis da les 10 dadoman a les 7 da sera enfin a la fin de la sajon.

Gran festa a Sèn Jan per i 40 egn de l’università de la terza età e del temp ledech. N travert emportant che testimoniea l amor per la cultura, la condivizion e l esser amisc che tegn ensema chesta scomenzadiva metuda su del 1986 con Rita Tentori Detomas. Con desvaliva intervistes vegn contà de chel che vegn fat, di corsc endrezé che i tocia desvalives argomenc che i à a che fèr ence co la storia e la cultura locala, la cura de la persona, la malaties, la medejnes, e ti ultimes tempes ence la ginastica. Na realtà che la deida a tegnir l cef atif e a fèr crescer i raporc anter la jent e la comunanza.

Te la rubrica “Svampol ciatarul: jent che fèsc jerveèr sie cunst” porton dant la terza puntata de Ewald Senoner, n artist de gran braura e sensibilità. Con sia miniatures l ne à encantà, no demò per coche l é stat bon de ge dèr vita a si lurieres, ma ence perché l ne à portà a fèr n viac te la storia a veder coche la era zacan te chesta valèdes. Te chesta terza puntata l ne mosciarà amò de outra curiositèdes desche la veia ferata de Gherdena, la Sia de Penìa e l mèsc olache l é nasciù.

I reports de chesta setemèna i é stac enjigné e porté dant da Angela Pederiva e Riccardo Zanoner.

Metù a jir col sostegn del Comun General de Fascia, de la Provinzia autonoma de Trent e de la Region autonoma Trentin – Südtirol, “Pedies” l va fora su **Trentino Tv – canal 10 Prov. de TN** - vigni sabeda da les 18.00 (sie da sera), de domenia da les 13.30 (mesa la does domesdi) e de lunesc da les 11.30 (mesa les doudesc).

L program ades l va fora ence sun **AltoAdige TV – canal 11 de BZ** - vigni domenia da les 18.00 (sie da sera).

Se pel veder duta la puntates ence sul canal YouTube de TV Ladina sot chest link:

<https://www.youtube.com/@TvLadina>

opuramenter se pel veder i servijes un a un su la piata Facebook de TV Ladina

<https://www.facebook.com/TelevizionLadina>

Traduzion di Servijes Linguistics e Culturèi del Comun general de Fascia

(cdt)